

Sud Bosne i Hercegovine



Суд Босне и Херцеговине


# BUDŽET ZA GRAĐANE 2023.



[www.sudbih.gov.ba](http://www.sudbih.gov.ba)  
[prios@sudbih.gov.ba](mailto:prios@sudbih.gov.ba)

Sud Bosne i Hercegovine  
Kraljice Jelene 88  
71000 Sarajevo  
Bosna i Hercegovina

Juni, 2023.



Poštovani građani i građanke,

S ciljem jačanja transparentnosti rada Suda Bosne i Hercegovine, i povjerenja javnosti u rad pravosuđa, pripremili smo dokument “Budžet za građane” koji na jednostavan način prikazuje nadležnosti, ciljeve, te proces planiranja i izvršenja budžeta Suda.

Budžet za građane sadrži ključne informacije o načinu planiranja i potrošnje budžetskih sredstava koja su dodijeljena Sudu, te javnosti omogućava bolji uvid u potrošnju novca poreskih obveznika. Sud Bosne i Hercegovine osnovan je Zakonom o Sudu BiH s ciljem osiguranja efikasnog ostvarivanja nadležnosti države Bosne i Hercegovine i poštivanja ljudskih prava i vladavine zakona na njenoj teritoriji, stoga i Sud nastoji da kroz nepristrasna i neovisna suđenja, svojim zakonitim i transparentnim radom doprinosi jačanju vladavine prava, te poštivanju prava i sloboda građana. Budžetom Suda osiguravaju se finansijska sredstva za provedbu strateških i operativnih aktivnosti i mjera, radi unaprjeđenja efikasnosti, ekonomičnosti i kvaliteta rada Suda.

Transparentnost i odgovornost pravosuđa bitna su karika u jačanju povjerenja javnosti u rad pravosuđa, iz kojih razloga Sud kontinuirano poduzima proaktivan pristup u činjenju dostupnim javnosti informacija o radu Suda, a ovaj dokument je samo nastavak tog rada.


PREDSJEDNIK SUDA

Ranko Debevec

## NADLEŽNOSTI

## SUDSKA ODJELJENJA

4



Prema Zakonu o Sudu Bosne i Hercegovine, Sud je nadležan da odlučuje u prvom stepenu u najsloženijim predmetima u krivičnoj oblasti (ratni zločini, organizirani i privredni kriminal i sva druga krivična djela utvrđena Krivičnim zakonom BiH), te u upravnim sporovima kada su u pitanju konačne odluke organa uprave na nivou Bosne i Hercegovine i u sporovima između entiteta i Brčko Distrikta BiH ili BiH i entiteta i Brčko Distrikta BiH. Apelaciono odjeljenje nadležno je da odlučuje o žalbama na odluke Krivičnog i Upravnog odjeljenja, te da rješava po prigovorima koji se odnose na kršenje izbornog zakona.

# ORGANIZACIONA STRUKTURA

U skladu sa nadležnostima, postoje tri sudska odjeljenja: Krivično odjeljenje, Upravno odjeljenje i Apelaciono odjeljenje.

## KRIVIČNO ODJELJENJE

Odjel I za ratne zločine

Odjel II za organizovani kriminal, privredni kriminal i korupciju

Odjel III za sva ostala krivična djela iz nadležnosti Suda

### Krivična nadležnost

Krivična nadležnost utvrđena je krivičnim i drugim zakonima BiH. Sud BiH nadležan je za krivična djela utvrđena zakonima Federacije Bosne i Hercegovine, Republike Srpske i Brčko distrikta BiH kada ta djela:

- a) ugrožavaju suverenitet, teritorijalni integritet, političku nezavisnost, državnu sigurnost i međunarodni subjektivitet Bosne i Hercegovine;
- b) mogu imati ozbiljne reperkusije ili štetne posljedice na privredu Bosne i Hercegovine ili ekonomiju BiH ili druge štetne posljedice za Bosnu i Hercegovinu.

Osim nadležnosti da presuđuje u prvom stepenu, Sud je nadležan da odlučuje o:

1. žalbama protiv presuda ili odluka Suda donesenih u krivičnim predmetima;
2. vanrednim pravnim lijekovima protiv pravosnažnih odluka Suda u krivičnim predmetima.

Osim toga, u nadležnosti Suda je i sljedeće:

1. da zauzima konačan i pravno obavezujući stav vezan za provođenje zakona Bosne i Hercegovine i međunarodnih ugovora na zahtjev bilo kojeg suda entiteta ili bilo kojeg suda Brčko distrikta BiH kojem je povjereno provođenje zakona Bosne i Hercegovine;
2. da donosi praktična uputstva za primjenu krivičnog materijalnog prava Bosne i Hercegovine iz nadležnosti Suda u vezi s krivičnim djelima genocida, zločina protiv čovječnosti, ratnih zločina i kršenja zakona i običaja rata, te pojedinačnom krivičnom odgovornošću u vezi s ovim djelima, po službenoj dužnosti ili na zahtjev bilo kojeg entitetskog suda ili suda Brčko distrikta BiH;
3. da odlučuje o pitanjima koja se tiču provođenja međunarodnih i međuentitetskih krivičnih propisa, uključujući i odnose sa Interpolom i drugim međunarodnim policijskim organima, kao što su transfer osuđene osobe, izručenje i predaja osoba koje druga država, odnosno međunarodni sud ili tribunal zahtijevaju od bilo kojeg organa na teritoriji Bosne i Hercegovine;
4. da rješava sukob nadležnosti između sudova entiteta, između sudova entiteta i suda Brčko distrikta BiH, te između Suda i bilo kojeg drugog suda;
5. da odlučuje o ponavljanju krivičnog postupka za krivična djela predviđena zakonima države Bosne i Hercegovine.

## UPRAVNO ODJELJENJE

Referat za upravne sporove

Parnični referat

Izvršni referat

### Upravna nadležnost

Sud je u upravnim stvarima nadležan da u prvom stepenu odlučuje:

1. po tužbama protiv pojedinačnih i općih konačnih upravnih akata, uključujući i upravnu šutnju, institucija Bosne i Hercegovine donesenih u vršenju javnih ovlaštenja, u skladu sa zakonom Bosne i Hercegovine;

2. o zahtjevima za zaštitu sloboda i prava građana zagantiranih Ustavom Bosne i Hercegovine kada su ta prava i slobode povrijeđeni konačnim pojedinačnim aktom institucija Bosne i Hercegovine, ako nije osigurana druga sudska zaštita.

Sud je naročito nadležan da ocjenjuje zakonitost pojedinačnih i općih izvršnih upravnih akata donesenih na osnovu državnog zakona, pri vršenju javnih dužnosti i organa vlasti Bosne i Hercegovine, za koje zakonom nije predviđeno sudske ispitivanje.

Rješava sukob nadležnosti između sudova iz entiteta, sudova entiteta i sudova Brčko distrikta Bosne i Hercegovine, te između Suda Bosne i Hercegovine i bilo kojeg drugog suda; odlučuje o ponavljanju postupka u sporovima, te rješava u svim drugim predmetima kada je to predviđeno zakonom Bosne i Hercegovine.

U skladu sa Zakonom o izvršnom postupku BiH, Sud BiH provodi prinudno izvršenje potraživanja na osnovu izvršnih i vjerodostojnih isprava, te postupak obezbjeđenja potraživanja, ako posebnim zakonom neko pitanje nije drugačije uređeno.

#### Parnična i izvršna nadležnost

U parničnim stvarima Sud je nadležan da u prvom stepenu rješava:

1. imovinske sporove između države Bosne i Hercegovine i entiteta, između države Bosne i Hercegovine i Brčko distrikta BiH, između entiteta, između entiteta i Brčko distrikta BiH i između institucija Bosne i Hercegovine koje vrše javna ovlaštenja;
2. imovinske sporove proistekle iz štete koja je nastala pri vršenju poslova organa uprave Bosne i Hercegovine, drugih institucija Bosne i Hercegovine i službenih lica tih organa i institucija;
3. druge imovinske sporove, kada je nadležnost Suda utvrđena zakonima Bosne i Hercegovine ili međunarodnim ugovorom.

#### Apelaciona nadležnost

Ono što je specifično za Sud BiH, jeste upravo da se u sklopu organizacije nalazi zasebno odjeljenje – Apelaciono odjeljenje, čija nadležnost je da odlučuje po:

1. žalbama protiv presuda ili odluka koje donese Krivično odjeljenje ovog Suda;
2. žalbama protiv presuda ili odluka koje donese Upravno odjeljenje ovog Suda;
3. vanrednim pravnim lijekovima protiv pravosnažnih odluka koje su donijela odjeljenja Suda, osim zahtjeva za ponavljanje postupka.



## APELACIONO ODJELJENJE

Odjel I koji odlučuje po pravnim lijekovima na odluke Odjela I Krivičnog odjeljenja

Odjel II koji odlučuje po pravnim lijekovima na odluke Odjela II Krivičnog odjeljenja

Odjel III koji odlučuje po pravnim lijekovima na odluke Odjela III Krivičnog odjeljenja, na odluke Upravnog odjeljenja, te rješava po prigovorima koji se odnose na izborna pitanja


Također, Apelaciono odjeljenje je nadležno i za:

1. rješavanje po prigovorima koji se odnose na kršenje izbornog zakona i dodatnih propisa i uputstava koje donosi Centralna izborna komisija BiH;
2. rješavanje u svim drugim predmetima kada je to predviđeno zakonom Bosne i Hercegovine.

S obzirom na vrste faza u krivičnom postupku u kontekstu pravnog lijeka, potrebno je ukazati da se u okviru Apelacionog odjeljenja po potrebi formira i trećestepeno vijeće, koje odlučuje po žalbama na presude drugostepenog vijeća, onda kada je to dopušteno po ZKP-BiH.

Pored sudskih odjeljenja, postoji i sudska uprava koja se sastoji od tri organizacione cjeline koje pružaju stručnu i administrativno-tehničku podršku u radu sudijama, a to su: Ured registrara, Zajednički sekretarijat i Jedinica interne revizije.

### URED REGISTRARA




Ured registrara Suda obavlja opšte, administrativno-tehničke poslove, poslove pravne podrške sudijama i druge poslove podrške neophodne za zakonito, blagovremeno i efikasno funkcionisanje Odjela I i Odjela II Krivičnog i Apelacionog odjeljenja Suda, u skladu sa Zakonom o Sudu i Poslovníkom o radu Suda.

### ZAJEDNIČKI SEKRETARIJAT



Zajednički sekretarijat Suda obavlja opšte administrativno-tehničke i pravne poslove, materijalno-finansijske poslove i poslove pravne podrške sudijama, neophodne za zakonito, blagovremeno i efikasno funkcionisanje Odjela III Krivičnog odjeljenja, Odjela III Apelacionog odjeljenja i Upravnog odjeljenja Suda, u skladu sa Zakonom o Sudu Bosne i Hercegovine.


# ORGANIZACIONA STRUKTURA SUDA BOSNE I HERCEGOVINE



## BROJ I STRUKTURA ZAPOSLENIH


Zakonom o budžetu institucija Bosne i Hercegovine i međunarodnih obaveza Bosne i Hercegovine za 2023. godinu, Sudu je odobreno ukupno 288 radnih mjesta. Od toga, 58 je sudijskih pozicija, dok se ostale pozicije odnose na stručno i administrativno-tehničko osoblje koje pruža podršku u radu sudijama.

12



# BUDŽETSKI KALENDAR

Budžetski kalendar je propisan Zakonom o finansiranju institucija Bosne i Hercegovine i definisani su rokovi i odgovornosti pojedinačnih institucija u procesu izrade budžeta. Budžetski proces počinje u januaru kada Ministarstvo finansija i trezora Bosne i Hercegovine svim budžetskim korisnicima dostavlja instrukciju za pripremu Dokumenta okvirnog budžeta (trogodišnja projekcija prihoda i rashoda), a završava najkasnije u decembru usvajanjem Zakona o budžetu institucija BiH i međunarodnih obaveza BiH od strane oba doma Parlamentarne skupštine BiH.




# IZVRŠENJE BUDŽETA U PRETHODNOJ GODINI

Zakonom o budžetu institucija Bosne i Hercegovine i međunarodnih obaveza Bosne i Hercegovine za 2022. godinu, Sudu Bosne i Hercegovine odobrena su sredstva u ukupnom iznosu od 19.203.000,00 KM. Zaključno sa 31.12.2022. godine utrošeno je ukupno 17.495.685,00 KM, odnosno, 91,11% odobrenog budžeta.

Detaljniji pregled odobrenog budžeta i utroška sredstava u 2022. godini dat je u nastavku.

14

VRSTA RASHODA	ODOBRENO ZA 2022.	RASHODI U 2022.	PROCENAT
Bruto plaće i naknade	15.229.000 KM	14.040.536 KM	92,20%
Materijalni troškovi	3.714.000 KM	3.205.996 KM	86,32%
Kapitalna ulaganja	260.000 KM	249.153 KM	95,83%
<b>UKUPNO</b>	<b>19.203.000 KM</b>	<b>17.495.685 KM</b>	<b>91,11%</b>



Najveći udio u strukturi rashoda budžeta Suda Bosne i Hercegovine odnosi se na troškove bruto plaća i naknada plaće za 288 sudija i uposlenika.

Na bruto plaće i naknade je utrošeno ukupno 12.745.608 KM, dok je na naknade plaće (topli obrok, prevoz, regres, smještaj, odvojeni život, otpremnine, jubilarne nagrade i pomoć u slučaju smrti i teške bolesti i invalidnosti) utrošeno ukupno 1.294.928 KM.

## STRUKTURA MATERIJALNIH TROŠKOVA



Najveći udio u strukturi materijalnih troškova čine ugovorene usluge i druge posebne usluge, čak 76,20%. Kada su u pitanju ugovorene usluge, najveći udio u strukturi ovih troškova odnosi se na troškove proistekle iz krivičnog postupka, i to: pravne usluge -troškove advokata po službenoj dužnosti, troškove svjedoka i vještaka, usluge prevođenja, troškove primarne zdravstvene zaštite za pritvorenike, kao i troškove po osnovu oslobađajućih presuda. U skladu sa Zakonom o krivičnom postupku Bosne i Hercegovine, Sud je dužan da osumnjičenom/optuženom u slučajevima obavezne odbrane i/ili slabijeg imovnog stanja, postavi branioca po službenoj dužnosti. U slučaju osuđujuće presude ovi troškovi padaju na teret osuđenog lica, osim u slučaju njegovog slabog imovnog stanja.

### STRUKTURA UGOVORENIH USLUGA



Pored troškova advokata po službenoj dužnosti i troškova po osnovu oslobađajućih presuda, najveći udio u strukturi ugovorenih usluga odnosi se na troškove svjedoka.

Osim direktnog rada na predmetima u nadležnosti Suda, velika pažnja posvećena je pružanju psiho-fizičke pomoći svjedocima i žrtvama koji svjedoče pred Sudom.

Odjeljenje za podršku svjedocima pruža podršku svim svjedocima optužbe i odbrane za koje se utvrdi da im je potrebna neka vrsta podrške iz nadležnosti Odjeljenja. Prioritet u radu je stavljen na rad sa svjedocima koji svjedoče u predmetima ratnih zločina, kojima se zbog specifičnosti prihičkog stanja pruža potrebna logistička, administrativna i psihološka podrška.

Stručna psihološka podrška i pomoć pruža se, prije svega, svjedocima koji su istovremeno i traumatizovane žrtve krivičnih djela, kako bi se svjedok ohrabrio da bez straha da izjavu i kako bi se pružanjem profesionalnih usluga izbjegla mogućnost da svjedočenje izazove dodatne negativne posljedice, novu patnju ili traumu potencijalnom svjedoku.

Psihološka podrška i pomoć svjedocima pruža se prije, za vrijeme i nakon suđenja.

Tokom 2022. godine, pružena je podrška za ukupno 733 svjedoka.





Reprezentacija je pravo zaposlenih u Sudu na korištenje finansijskih sredstava za ugostiteljske usluge i nabavku poklona, a u vezi s poslovima i zadacima vršenja nadležnosti i pripadajućeg djelokruga rada Suda, radi održavanja službenih i poslovnih kontakata, prijema gostiju, obilježavanja godišnjica, kao i povodom drugih značajnih događaja. Sudu Bosne i Hercegovine je, u skladu sa odredbom člana 5. Pravilnika o korištenju sredstava za reprezentaciju Vijeća ministara Bosne i Hercegovine, za usluge reprezentacije odobren iznos od 20.000 KM.

Tokom 2022. godine, za ovu namjenu je utrošeno 3.971 KM, odnosno 19,86%.


U strukturi ugovorenih usluga, finansijska sredstva za usluge reprezentacije iznose 0,16%.

U ostale ugovorene usluge spadaju troškovi štampanja, javnog informisanja, objavljivanja tendera i oglasa, održavanja konvencija i seminara, izdaci za volonterski rad, te usluge primarne zdravstvene zaštite. Za ovu namjenu je u toku 2022. godine sveukupno utrošeno 63.245 KM.


Kada su u pitanju troškovi primarne zdravstvene zaštite, troškovi liječenja osumnjičenog ili optuženog obuhvataju:

1. Troškove liječenja u zdravstvenoj ustanovi osumnjičenog dok se nalazi u pritvoru, ako nema pravo na zdravstvenu zaštitu;
2. Troškove liječenja osumnjičenog ili optuženog upućenog na posmatranje u zdravstvenu ustanovu za duševno bolesna lica;
3. Troškove porođaja osumnjičene koja je u pritvoru ako nema pravo na zdravstvenu zaštitu;
4. Troškove liječenja pritvorenog lica.

## Struktura kapitalnih ulaganja



Tokom 2022. godine nabavljena je oprema u vrijednosti od 159.566 KM, i najveći dio se odnosi na računarsku opremu i audio-video opremu za sudnice. Nabavljene su i licence u vrijednosti od 20.006 KM. Također, u 2022. godini je izvršena rekonstrukcija prostora u vrijednosti od 69.581 KM, te je izvršena adaptacija podrumskih prostorija u kojima je sada smještena arhivska građa i pisarnica Odjela I i II.




Sud Bosne i Hercegovine trenutno raspolaže sa 9 sudnica, koje su u potpunosti opremljene svom opremom za funkcionalno i kvalitetno odvijanje suđenja koje se snima audio i video opremom. Istom je omogućeno i saslušanje lica putem videokonferencijske veze, kao i mogućnost simultanog prevođenja u slučaju da u postupku učestvuju lica koji se ne služe jezicima koji su u službenoj upotrebi Suda BiH.

Pored toga određene sudnice raspolažu i posebnom prostorijom za saslušanje svjedoka koji imaju svjedočiti iz druge prostorije uz mjere distorzije glasa i slike, što je čest slučaj kada se pred Sudom pojavljuju svjedoci koji su svjedočili pred Međunarodnim krivičnim tribunalom za bivšu Jugoslaviju.



## OSTVARENI PRIHODI U 2022. GODINI

### Evidentirani prihodi na dan 31.12.2022. godine



Na dan 31.12.2022. godine evidentirani su prihodi u ukupnom iznosu od 5.258.451,98 KM, od čega se najveći dio odnosi na kazne u krivičnom postupku, sudske takse i administrativne takse. Strukturu prihoda od novčanih kazni u krivičnom postupku, shodno odredbama Krivičnog zakona Bosne i Hercegovine čine novčane kazne, zamjena kazne zatvora u novčanu, troškovi krivičnog postupka, troškovi paušala i oduzeta protupravno stečena imovinska korist.

Sa 31.12.2022. godine, prihodi od novčanih kazni u krivičnom postupku su ostvareni u ukupnom iznosu od 4.839.691,17 KM, od čega se 629.099,13 KM odnosi na uplate potraživanja nastalih tokom 2022. godine, a preostali iznos od 4.210.592,04 KM odnosi na uplate potraživanja po osnovu novčanih kazni iz prethodnih godina.

Prilikom izricanja presude kojom je počinitelj krivičnog djela oglašen krivim, odnosno, pravno lice oglašeno odgovornim za počinjenje krivičnog djela, Sud Bosne i Hercegovine kao sankciju može izreći novčanu kaznu, oduzeti imovinsku korist stečenu izvršenjem krivičnog djela i optuženog obavezati na plaćanje troškova krivičnog postupka. Visina novčane obaveze i rok za izvršenje iste određuju se u izreci presude.

Sud Bosne i Hercegovine je izradio aplikaciju za evidenciju novčanih potraživanja, s ciljem da se omogućiti povezivanje potraživanja po osnovu sudskih odluka sa uplatama u glavnoj knjizi, efikasno praćenje stvarnog stanja naplaćenih i nenaplaćenih prihoda, te da se osigura vidljivi trag o svim preduzetim radnjama od momenta kad Sud donese odluku do same uplate po osnovu konkretnog predmeta.

U skladu sa članom 42a Krivičnog zakona Bosne i Hercegovine, izrečena kazna zatvora do jedne godine će se na zahtjev osuđenog zamijeniti novčanom kaznom koja se plaća u jednokratnom iznosu u roku od 30 dana. Kazna zatvora zamjenjuje se novčanom tako što se svaki dan izrečene kazne zatvora izjednačava s jednim dnevnim iznosom novčane kazne ili sa 100 KM ako se novčana kazna utvrđuje u određenom iznosu. U slučaju da se kazna ne plati u previđenom zakonskom roku, Sud donosi odluku o izvršenju kazne zatvora. Ako se novčana kazna plati samo djelimično, izvršit će se kazna zatvora srazmjerno iznosu koji nije plaćen.

## IPA PROJEKAT

U toku 2022. godine implementiran je projekat IPA 2019 – Unaprjeđenje rada na predmetima ratnih zločina u BiH, finansiran iz IPA fondova s ciljem implementacije Državne strategije za rad na predmetima ratnih zločina i smanjenja broja neriješenih predmeta ratnih zločina.

Budžet projekta za 2022. godinu iznosio je 687.631,94 KM i u periodu od 01.01. do 31.12.2022. godine utrošeno je ukupno 591.738,75 KM, odnosno 86,05% odobrenih sredstava.

Opći cilj ovog projekta je jačanje vladavine prava u Bosni i Hercegovini, dok je konkretan cilj povećanje efikasnosti rada na predmetima ratnih zločina u pravosuđu u Bosni i Hercegovini smanjenjem broja neriješenih predmeta ratnih zločina u svim pravosudnim institucijama na nivou Bosne i Hercegovine.

U okviru ovog projekta bilo je angažovano 15 zaposlenika koji su pružali stručnu i administrativno-tehničku podršku u radu sudijama na predmetima ratnih zločina.

Struktura troškova data je u nastavku.




VRSTA RASHODA	ODOBRENO ZA 2022.	RASHODI U 2022.	PROCENAT
Bruto plaće i naknade	516.850,61 KM	454.618,07 KM	87,96%
Naknade troškova zaposlenih	77.489,12 KM	58.442,58 KM	75,42%
Materijalni troškovi	93.292,21 KM	78.678,10 KM	84,34%
<b>UKUPNO</b>	<b>687.631,94 KM</b>	<b>591.738,75 KM</b>	<b>86,05%</b>

## BUDŽET ZA 2023. GODINU

Prilikom procesa planiranja budžeta Suda Bosne i Hercegovine za 2023. godinu, polazna osnova je bilo izvršenje budžeta za prethodnu godinu, te aktivnosti i ciljevi planirani Srednjoročnim planom rada Suda za naredni trogodišnji period. Bruto plaće i naknade za 288 sudija i uposlenika obračunate su u skladu sa Zakonom o plaćama i drugim naknadama u sudskim i tužilačkim institucijama na nivou BiH i Zakonom o plaćama i naknadama u institucijama BiH, dok su operativno-materijalni troškovi planirani prema izvršenju iz prethodnih godina, te u skladu sa očekivanim rastom cijena energenata na tržištu. Najveći udio u materijalno-operativnim troškovima čine troškovi ugovorenih usluga, odnosno troškovi krivičnog postupka koji, u skladu sa Zakonom o krivičnom postupku BiH, padaju na teret budžeta institucija Bosne i Hercegovine (troškovi odbrane po službenoj dužnosti, troškovi vještaka, svjedoka, tumača, troškovi liječenja pritovorenih lica i sl.). Većina ovih troškova se odnosi upravo na troškove advokata koje je, po Zakonu o krivičnom postupku BiH, Sud Bosne i Hercegovine dužan da postavi osumnjičenom/optuženom u slučajevima obavezne odbrane i/ili slabijeg imovnog stanja.

Hijerarhijski pregled definisanih ciljeva



## Programska struktura budžeta

BUDŽETSKI PROGRAM	PROGRAMSKE AKTIVNOSTI	INDIKATORI
Procesuiranje predmeta u okviru krivične, upravne i apelacione nadležnosti	1. Procesuiranje predmeta koji se vode pred Sudom BiH 2. Upravljačka aktivnost i aktivnost podrške	Procenat riješenih predmeta Ostvarena kolektivna norma Kvalitet rada na predmetima Stopa protoka predmeta Prosječan trošak programa po obrađenom predmetu

Programsko budžetiranje predstavlja proces planiranja, odobravanja i izvršavanja budžeta po programskoj klasifikaciji kojom se prikazuju ciljevi, aktivnosti, očekivani rezultati i sredstva potrebna za ostvarenje postavljenih ciljeva.


Programi obuhvataju rashode koji imaju zajednički cilj i ishod koji se programom želi postići. Budžetski program „Procesuiranje predmeta u okviru krivične, upravne i apelacione nadležnosti“ okuplja čitav niz različitih aktivnosti i izlaznih rezultata, kojima je zajedničko da za cilj imaju efikasno procesuiranje predmeta u nadležnosti Suda BiH.

Operativni cilj ovog programa je: „Unaprijediti učinkovitost i kvalitet rada na predmetima“.

Priručnikom za izradu programskog budžeta u institucijama Bosne i Hercegovine definisano je da je svrha programskog budžeta da se ispune dva glavna cilja. Prvi cilj je da se poboljša određivanje prioriteta budžetskih rashoda, odnosno da se pomogne u raspodjeli ograničenih javnih sredstava na one programe od kojih će građani imati najviše koristi. Drugi cilj je da se budžetski korisnici koji troše data sredstva potaknu da poboljšaju efikasnost i efektivnost pružanja usluga. Kroz ispunjavanje spomenutih ciljeva programski budžet postaje i efikasno sredstvo koje pomaže građanima da razumiju razloge koji stoje iza odluka o politikama. Programsko budžetiranje nadalje omogućuje nadležnima za izradu budžeta da procijene koristi i efikasnost programa u odnosu na njihove troškove. Model programske strukture omogućava stvaranje veze između programa iz programskog budžeta s programima u srednjoročnom planu, te je osigurana povezanost strateških i operativnih ciljeva s budžetskim sredstvima.

### Struktura odobrenog budžeta za 2023. godinu

VRSTA RASHODA	ODOBRENO ZA 2023.
Bruto plaće i naknade	16.640.000 KM
Materijalni troškovi	3.206.000 KM
Kapitalna ulaganja	457.000 KM
<b>UKUPNO</b>	<b>20.303.000 KM</b>





Ključni operativni ciljevi koji će se ostvarivati kroz plan rada Suda i sudskih odjeljenja su:

- Unaprjeđenje efikasnosti, efektivnosti i ekonomičnosti, te kvaliteta rada na predmetima u nadležnosti Suda
- Smanjenje broja neriješenih predmeta
- Jačanje percepcije javnosti, te poboljšanje promocije uloge i rada Suda, izradnja kapaciteta u oblasti
- Izgradnja kapaciteta u oblasti strateškog planiranja, planiranja i izvršenja budžeta, te razvoj modernog pristupa menadžmentu i upravljanju ljudskim resursima
- Jačanje sigurnosnih kapaciteta unutar Komplexa pravosudnih institucija BiH

Detaljniji pregled planiranog i odobrenog budžeta za 2023. godinu dat je u nastavku.

EKONOMSKA KLASIFIKACIJA RASHODA	ODOBRENO ZA 2023.
Bruto plaće i naknade	14.953.000 KM
Naknada troškova zaposlenih	1.687.000 KM
Putni troškovi	21.000 KM
Izdaci telefonskih i poštanskih usluga	260.000 KM
Izdaci za energiju i komunalne usluge	350.000 KM
Nabavka materijala	118.000 KM
Izdaci za usluge prevoza i goriva	10.000 KM
Izdaci za tekuće održavanje	126.000 KM
Izdaci osiguranja i bankarskih usluga i usluga platnog prometa	6.000 KM
Ugovorene i druge posebne usluge	2.315.000 KM
Kapitalna ulaganja	457.000 KM
<b>UKUPNO</b>	<b>20.303.000 KM</b>

U toku 2023. godine planirana je nabavka namještaja, računarske i audio-video opreme s ciljem opremanja i puštanja u rad sudnice broj 10. Na ovaj način će se ojačati postojeći kapaciteti Suda i osigurati kvalitetno i blagovremeno odvijanje ročišta u predmetima u nadležnosti ovog Suda.

## PLANIRANI PROJEKTI U 2023. GODINI

### IPA 2019

U periodu od 01.01.2023. do 30.04.2023. godine nastavljena je implementacija projekta IPA 2019 – “Unaprjeđenje rada na predmetima ratnih zločina u Bosni i Hercegovini”. U okviru ovog projekta bilo je angažovano 7 zaposlenika koji su pružali stručnu i administrativno-tehničku podršku u radu sudijama na predmetima ratnih zločina. U navedenom periodu utrošeno je ukupno 79.418,90 KM, od čega se 76.355,90 KM odnosi na bruto plaće i naknade plaće, a 3.063,00 KM na ugovorene usluge.

### IPA 2018

U 2023. godini planirana je implementacija projekta IPA 2018 – “Premošćavanje podrške za rješavanje predmeta ratnih zločina”, i to u periodu od 01.05.2023. do 30.11.2023. godine. U navedenom periodu bit će angažovano 7 zaposlenika koji će pružati stručnu i administrativno-tehničku podršku u radu sudijama na predmetima ratnih zločina.

Odobreni budžet ovog projekta iznosi ukupno 226.275,84 KM, od čega se 223.570,93 KM odnosi na bruto plaće i naknade plaće, a 2.704,91 na ugovorene usluge.

Opći cilj ovog projekta jeste potpuna implementacija Revidirane državne strategije za rad na predmetima ratnih zločina. Specifični cilj je povećanje efikasnosti rada na predmetima ratnih zločina u pravosuđu u Bi Hi smanjenje broja neriješenih predmeta.

## KONTAKT INFORMACIJE

### ADRESA SUDA BIH:

Sud Bosne i Hercegovine  
Kraljice Jelene 88  
71000 Sarajevo  
Bosna i Hercegovina

### TELEFONI:

Centrala Suda BiH  
00387 (0) 33 707 100

Odjeljenje za informisanje javnosti  
00387 (0) 33 707 165/164/306/316

Službena internet-stranica Suda: [www.sudbih.gov.ba](http://www.sudbih.gov.ba)

### RADNO VRIJEME PRIJEMNE KANCELARIJE:

8:00 – 16:00

Stranke se mogu obratiti predsjedniku Suda BiH prijedlozima, predstavkama, pritužbama i upitima u pisanoj formi. Podnesci bi trebali biti napisani na jednom od jezika naroda Bosne i Hercegovine; trebaju biti razumljivi i sadržavati sve potrebne podatke (broj predmeta, naziv stranke u sporu, datum dostave Sudu).

SUD BOSNE I HERCEGOVINE  
Kraljice Jelene 88, 71000 Sarajevo, Bosna i Hercegovine  
Tel.: +387 33 707 100  
Email: [pios@sudbih.gov.ba](mailto:pios@sudbih.gov.ba)  
[www.sudbih.gov.ba](http://www.sudbih.gov.ba)